

TIMOHTI **Chyáng Htang Dàm Hun Kat é** **Laiká** **(2 Timothy)**

¹ Hkrisduq Yesuq chyáng mâ é asak byi râ gâ é danggidiq eq rajung za, Garai Gasang ô nau é dông, Hkrisduq Yesuq é lagyo nghut sù, ngò, Poluq gi, ngò chyitdap é ngá zo Timohti lé, dang kyô kat lâ.

² Haû Íwa Garai Gasang eq nga-nhông é Yhumsîng Hkrisduq Yesuq chyáng mâ é jeju eq shogyo nhikmyin hkyô, nguingón hkyô gi, ru joq nyî sháng gaq ô!

Lumlúq Râ Matú Myit Wum Byî É Hkyô

³ Ngò gi, ngá é kyûdung dang má, nyí, myín, abyit alan nang lé bûn nyî uchyang, sân-yúng é i-myt mai, ngá é íchýí íwâ pé dojaú é su, ngò dojaú nyî é Garai Gasang lé, jeju hkya-ôn nyi lâ.

⁴ Ngò gi, ngò má gabú hkyô byíng jup sháng gaq nghû, náng é ngaubyi lé myit bûn nyî mù, nang lé gyai yhang myàng nau nyi ri.

⁵ Ngò gi, nang é gyíng é lumjíng myit lé lhoq pûn yù mù, náng whoí Lu-i eq náng nu U-ni nhik chyáng má hí bo é lumjíng myit, ahkuî, náng chyáng le bo ri nghû, hkyak myit lum nyi lâ.

⁶ Hau é yanmai, ngò loq ke byî é dông, nàng má bo tô é Garai Gasang é chyunghuq lé, gyúng nhang nyi râ matú, nang lé ngò lhoq pûn kat lâ.

⁷ Hkâsu mù gâ le, Garai Gasang gi, gyuq sê é myit nga-nhúng lé a kat byî e za, a-tsam bo é myit,

chyitdap sê é myit, yhumsing gùng lé dat hkang é myit sheq kat byî tô é ru nghut lhê.

⁸ Haû mù luí, nàng gi, nga-nhùng é Yhumsing eq séng luí saksé hkâm é hkyô má le, Yhâng é yanmai htóng byû dut to sù ngá é hkyô má le, hoq myit a bo é za, Garai Gasâng é wum-o mai, haû gabú danglu é matú, ngò eq rahá wuîhke jamjau chôm hui goq.

⁹ Garai Gasang gi, nga-nhúng zui saí é muzó đông a nghut e za, Yhânggùng yhang myit sôn tô é hkyô eq Yhâng é jeju yanmai za, nga-nhúng lé, hkyi yù luí chyoiyúng é asak duì hkyô má ji yù bê nghut ri. Ahkýng nghu é lháng a joq shi mai yhang, jeju haû gi, Hkrisduq Yesuq má nga-nhúng lé byi to gù nghut bê.

¹⁰ Nghut kôlhang, nga-nhùng é hkyi yù Sù, Hkrisduq Yesuq pô htoq é đông, ahkuí, haû lé lhoq htoq shit bê nghut ri. Yhang gi, shî-nò hkyô lé lhoq htên pyám luí, haû gabú danglù đông mai, asak lé le, a dat htên byoq é hkyô lé le, lhoq htoq shit bê nghut ri.

¹¹ Ngò gi, gabú danglu é matú hko kyo sù, lagyo eq mhoqshit sù đông, hkyin tô é hui sù nghut lhê.

¹² Hau é yanmai, ngò gi, wuîhke jamjau shî lé huí nyi é nghut lhê. Nghut kôlhang, ngò gi, ó yuq lé lumjúng bê nghut é hkyô lé, sê é htoq agó, Yhang lé ngò ap tô é pé lé, haû buinyì jé shoq, Yhang wó zúng râ nghut lhê nghu hkyak myit lum tô é yanmai, ngò a hoq.

¹³ Nàng gi, ngá chyáng mai wó gyô yu é tengmán dang pé lé, Hkrisduq Yesuq má, lumjúng myit eq chyitdap myit mai alik kut yu nyì aq.

¹⁴ Nang lé ap byî to bê, haû ge é mungdang lé, nga-nhùng chyáng bo tô é Chyoiyúng Woi-nyí é

wum-o mai zúng nyí aq.

¹⁵ Asia mau mâ é bang yuq hkanmó gi, ngo lé pyâm to kô é hkyô lé, nàng sê lê; haú bang má, Hpugelu eq Heramoge nhik le bo akô nghut ri.

¹⁶ Haú Yhumsîng gi, Onesihpurû é yhumbyù lé shogyo nhikmyîn é hkyô tân shit sháng gaq; hkâsu mù gâ le, yhang gi, ngo lé anum num myit lhoq ngón é htoq agó, ngò wut é shamtoq-tuî é yanmai, a hoq e za,

¹⁷ yhang, Romaq myuq má jé nyi é hkûn, ngo lé myang hui shoq, ho shikut é sù nghut ri.

¹⁸ Haú Yhumsîng gi, haú buinyì má, yhang lé haú Yhumsing é shogyo nhikmyin hkyô byi sháng gaq! Ehpesu myuq má, yhang ngo lé hkâ-myhó garúm bê nghut é gi, nàng rago yhang sê lê.

2

¹ Haú mù, ngá zo ê, nàng gi, Hkrisduq Yesuq mâ é jeju hkaú má, wúm bo nyi aq.

² Nàng gi, saksé myo myô é hí má ngá chyáng mai wó gyô yù bê hkyô pé lé, góbang lé dat mhoqshit é, wó lum é bang lé ap byi aq.

³ Hkrisduq Yesuq é ge é gyezo rayuq su, wuîhke hkyô lé chôm jan nyi sháng.

⁴ Gyezo rayuq dông gyè mù wùn waq nyi é sù, ó yuq nghut kôle, gotû muzó má a bo lom é za, yhang lé hkunmó hkyô nyi é gyezau lé, gabú nhâng nau é chyat nghut lê.

⁵ Haú eq rajung za, shingjóng é sù rayuq le, shingjóng lhum poî wang é hkûn, tô tô é tarâ dông a châng e nghut le gi, ung é aróng chyunghuq lé wó yû râ a nghut.

⁶ Yo-mû zuî shikut é sù gi, kyôshi lé sâng-hi myang hkam yù râ sù nghut lhê.

⁷ Haû Yhumsîng gi, shí pé banshoq lé wó sê é nyan nang lé byi râ nghut é yanmai, ngò taî é hkyô pé lé myit wú aq;

⁸ Haû Dawiq é awut ashín nghut sù, Yesuq Hkrisduq gi, shi é mai dum dui toq bê hkyô lé myit bun aq; haû gi, ngá é gabú danglù nghut lhê.

⁹ Gabú danglù hau é yanmai, mara bò sù rayuq lé su, ngò gi, kyum hut é hui luî, hpuzô nyi é nghut lhê. Nghut kôlhang, Garai Gasâng é mungdang gi, kyum hut huî é a nghut.

¹⁰ Haû mù luî, ngò gi, Hkrisduq Yesuq chyáng mâ é hkyi yù hkyô eq ahtum abyuq é hpungwup shingkang lé wó yû kó sháng gaq nghû, haû hkyin yù hui bâng é matú, jung hkangmó lé hkam jân nyi lhê.

¹¹ A-ô mâ é dang gi, lumgíng é dang nghut lhê: Nga-nhúng gi, Yhang eq rahá shî bê nghut jáng, Yhang eq rahá duì râ nghut lhê.

¹² Nga-nhúng gi, hkam jân é nghut jáng, Yhang eq rahá up râ nghut lhê.

Nga-nhúng gi, Yhang lé he-ngik pyâm é nghut jáng, Yhang le, nga-nhúng lé he-ngik pyám râ nghut lhê.

¹³ Nga-nhúng gi, lhumzui myit a bò kôlhang, Yhang gi, lhumzuî nyi râ nghut lhê. Hkâsu mù gâ le, Yhang gi, yhânggùng yhang wó he-ngik pyâm é a nghut.

Garai Gasâng Hí Má Myoqdong Wó É Mû Zui Sù

¹⁴ Nàng gi, yhangmoq lé, shí hkyô pé xoq luî lhoq pûn nyi aq. Dang pé eq séng luî, a byoq lhûm nyi kó

sháng gaq, Garai Gasâng hí má yhangmoq lé sidiq byi aq. Haû gi, akyû a bo é htoq agó, wó gyô é bang lé htên byoq nhang é hkyô za nghut lhê.

¹⁵ Nang gi, haû tengmán é mungdang lé jo shoq chung jai é eq, hoq nó a râ é mù zui sù rayuq đông Garai Gasâng hí má myoqdong wó shoq, wó dut é myhó shikut aq.

¹⁶ Tarâ a hkunggâ é po-ming ming bang lé koi pyám aq. Hkâsu mù gâ le, haû su kut é bang gi, tarâ a hkunggâ é hkyô má je riyhang wang nân ló byuq é bang dut kó râ nghut lhê.

¹⁷ Yhangmoq é mhoqshit hkyô gi, mong ana su byo myín ló râ nghut lhê; haû bang má Humenu eq Hpilitu nhik le bò kôluí,

¹⁸ haû tengmán hkyô mai sô nghoq ló byuq akô. Yhangnhik gi, haû dum dui toq hkyô dut lai bê ga tái kômù, ra-âm é lumjínq hkyô lé lhoq htên pyám byí akô nghut ri.

¹⁹ Nghut kôlhang, "Haû Yhumsîng gi, Yhang eq sêng é bang lé sê lhê."☆ ga luí le, "Haû Yhumsîng é myîng lé yín yu é bang yuq hkangmó gi, agè ashop hkyô mai lhing tau ra kó râ nghut lhê." ga luí le, dizik haû htung tap tô é, Garai Gasâng é ging tîng é apûn awang gi, gîng nyì ri.

²⁰ Yhûm mó ralhûm má gi, hîng auhkoq zè, ngùn auhkoq zè baú za joq é a nghut, sik auhkoq zè, tse auhkoq zè le joq lhê; ra-am gi, aróng hkyo é matú, ra-am gi, aróng hkyo é matú a nghut.

²¹ Haû mù luí, haû pé mai yhumsîng gùng lé lhoq sansêng pyâm é sù gi, chyoiyúng luí, haû Yhumsîng chung jai gínq é sù, ge é muzó hkangmó kut rá

☆ 2:19 Gyung So 16:5

hen tô é sù nghut é yanmai, aróng hkyô é matú chungzè dut râ nghut lhê.

²² Zoram é agè ashop é ô naù hkyô lé koi pyám mù, haù sân-yúng é myit mai, Yhumsing lé wut dúng é bang eq rahá, dingmán hkyô, lhumzui hkyô, chyttdap hkyô, nguingón hkyô pé lé, châng hkat nyí aq.

²³ Go é eq ngok é đông dang jet jet lhùm é hkyô gi, mabyoq lhoq htoq é hkyô nghut é lé, nàng sê lhê nghut é yanmai, haù hkyô lé koi pyám aq.

²⁴ Haù Yhumsing é dui-nhâng zoshâng gi, mabyoq a lhoq htoq é za, yuq hkgámó lé dat myit tê byí é, wó mhoqshit é, a dat nhik-yô é su dut ra râ nghut lhê.

²⁵ Yhang gi, yhang lé htuq htíng é bang lé, nú-nhâm é đông mhoqshit byi ra râ nghut lhê; haù hkún, Garai Gasang gi, yhangmoq lé myit lhíng hkyô byi mù, tengmán hkyô lé sê gyo nhâng lui,

²⁶ yhangmoq gi, bûn gyíng lò mù, nat Tsadán ô nau é hkyô lé kut byi râ matú, chyup yú huí é, nat Tsadán é tuihkyó mai wó hpang lut ló kó abe nghú, myit lum kat lhê.

3

Jihtûm Buinyì Pé Má Dut Lò Râ Hkyô

¹ Jihtûm buinyì pé má, wuîhkê é ahkyíng pé joq lò râ nghut é lé, nàng matsíng to aq.

² Hkâsu mù gâ le, haù u lé, byu pé gi, yhumsing gùng lé za chyttdap é bang, ngùn lé myoqnoq é bang, gumrong é bang, nghutbûn é bang, góbang lé tái hpoi é bang, înu îwa nyo é lé a gyô é bang, jeju a dat bûn é bang, a chyoiyúng é bang,

³ chyitdap myit a bo é bang, mara hkyut byi a sê é bang, lumù gansang é bang, yhumsing gùng lé hkâng a sê é bang, byuwuî pé, ge é hkyô lé a ngui é bang,

⁴ haq gumlaû é bang, a bun a so dut wún é bang, yhumsing gùng lé za hkik bûn é bang, Garai Gasang lé chyitdap é bang dut râ malaî ngón kún hkyô lé za chyitdap é bang, dut bùm kó râ nghut lhê.

⁵ Yhangmoq gi, tarâ hkunggâ é bang su dut kôlhang, haú pê é a-tsam lé he-ngik pyâm akô nghut ri; haú sù é bang lé, nàng koi pyâm nyi aq.

⁶ Yhangmoq gi, hpaqchyî da mù yhûm pé má wàng kôluî, mara wôlai lé wun é, agè ashop é ô nàu hkyô ajung jung má sô nghoq lô byuq é,

⁷ hkâ-nhâm le mhoq yu nyi kôlhang, haú tengmán hkyô lé a sê gyô é, myit nyhôm é myiwe wuî lé wó lâng nghoq yu é bang nghut akô.

⁸ Yanne eq Yambre nhik gi, Mosheq lé htuq htíng é su, haú bang le, haú tengmán hkyô lé htuq htíng akô nghut ri; yhangmoq gi, myit é hkyô htên byuq kôluî, haú lumjíng hkyô má lhum a zuî é bang nghut akô.

⁹ Nghut kôlhang, haú nhik é hkyô byông htoq lo é su, yuq hkangmó é hí má, yhangmoq ngok é hkyô byông htoq lô râ nghut mù, haú mai lai luî yhangmoq wó kut jat kó râ a nghut.

Timohti Lé Pying Kat É Dang

¹⁰ Nàng kúm gi, ngá é mhoqshit hkyô, ngá é nyiyap hkyô, ngò myit myoqbyu tô é hkyô, ngá é lumjíng hkyô, myit hîng hkyô, chyitdap hkyô, hkam jan hkyô,

¹¹ zing-ri huî é hkyô eq wuîhke jamjau hkyô pé lé le, Antioku wà mó, Ikoni wà mó eq Lustra wà mó pé má ngò hui zô é, zing-ri hkyô pé lé, ngò hkam jan bê hkyô lé le, nàng rago sê lhê. Nghut kôle, haû Yhumsîng gi, haû pé banshoq mai ngo lé xe yù bê nghut ri.

¹² Gè gè yhang, agè ashop é byu pé eq mhaû kut é bang gi, mhaû zô nyi bum é eq mhaû zô é huî nyi bùm kôluî, a ge é hkyô shut je riyhang myô jat lò kô é hkûn,

¹³ Hkrisduq Yesuq má tarâ hkunggâ é asak dông nyiyap nau é bang yuq hkanmó gi, zing-rî é hui kó râ nghut lhê.

¹⁴ Nghut kôlhang, nàng gi, ô pê chyáng mai nàng mhoq yû bê hkyô lé le, Hkrisduq Yesuq lé lumjîng jáng hkyi yu é hui shoq,

¹⁵ nang lé hpaqchyî byéng-yá wó byî é chyoiyúng Chyúmdang pé lé, zoshâng hkûn mai nàng sê to bê hkyô lé le, nàng sê é yanmai, nàng mhoq yu to bê hkyô eq hkyak lumjîng to bê hkyô má, xoq kut nyî aq.

¹⁶ Chyúmdang hkanmó gi, Garai Gasâng é soq hâng tô é pé chyat nghut é yanmai, mhoqshit é hkyô, tân mhoq é hkyô, lhoq jo byî é hkyô eq dingmán hkyô lé tân shit byî é hkyô pê é matú, akyû bo ri;

¹⁷ haû mù luî, haû Garai Gasâng é byù gi, ge é muzó jizó hkanmó lé kut râ matú, wó gumjup râ nghut lhê.

4

¹ Garai Gasâng é hí má le, dui nyi bang eq shi byuq bang lé tarâ dara râ sù Hkrisduq Yesuq é hí

má le, Yhang htoq shit râ hkyô eq Yhâng mingdán é yanmai, ngò, nang lé pying kat é gi,

² haû mungdang lé hko kyo aq; ahkyíng yam-yoq ang kôlháng, a ang kôlháng, rì rì hen to aq; myit gyaí hing é eq rago za mhoqshit é dông, lhoq jo byi, tân mhoqshit é eq myit wum byi kut nyí aq.

³ Hkâsu mù gâ le, byu pé gi, tengmán mhoqshit hkyô lé a kâm gyô é ahkyíng jé mù, yhangmoq ô naù yut yut é hkyô cháng luí, yhangmoq é no yo bui nau é nohkyap gyô nau é hkyô taí nhâng râ matú, sará pé rajùm rayò lé lhîngkyuq má lhoq tsing to kó râ nghut lhê.

⁴ Yhangmoq gi, haû tengmán hkyô mai yhangmoq é nohkyap lé lhing pyám mù, myit htoq mhômyi dang shut lhing ló kó râ nghut lhê.

⁵ Nghut kôlháng, nàng gi, dut tô é hkyô banshoq má rago sidiq nyí aq; wuîhke jamjau hkyô lé hkam jân nyí aq; gabú danglù hko kyô é muzó kut nyí aq; nàng é hpungmû banshoq lé wùn waq nyí aq.

⁶ Hkâsu mù gâ le, ngò gi, shuq jung hkungga ralhum dông hut pyâm é huí nyí gù nghut mù luí, mingkan mai ngò htoq ló râ ahkyíng jé bê nghut ri.

⁷ Ngò gi, haû ge é majan le zan bê; din shingjóng lhùm é hkyô le bàn bê; haû lumjíng hkyô le chang bê nghut lhê.

⁸ Ahkuí, haû tengmán é tarâ Agyì nghut sù, Yhumsíng gi, haú buinyí má ngo lé ap byi râ nghut é, haû dingmán hkyô é janmaú lé, ngá matú tô to byi bê nghut lhê. Haû gi, ngá é matú za a nghut, Yhang htoq shit râ hkyô lé myit lánng nyí é bang banshoq é matú le nghut lhê.

Timohti Lé Jì Kat É Hkyô

⁹ Nàng gi, ngá chyáng wó dut é í hân hân lé lô aq.

¹⁰ Hkâsu mù gâ le, Demaq gi, mingkan shî lé chyitdap é yanmai, ngo lé pyám to luí, Htesaloni wà mó shut; Krezen gi, Galatiq mau shut; Tituq gi, Dalamati mau shut, e ló byuq bekô nghut é yanmai nghut lhê.

¹¹ Lukaq za ngò eq rahá nghut nyi lhê. Markuq lé, nàng eq rahá shuí lé lò aq; yhang gi, ngá é hpungmû má wó htuqáng râ sù nghut lhê.

¹² Ngò gi, Tuhkiku lé Ehpesu myuq shut nhang kat bê nghut lhê.

¹³ Nàng gi, lé lo é hkûn, Troa myuq má, Karpu chyáng ngò tô tô é buhîng haû lé le, ngá é chyúmding lé le, je luí eq haû shokuq chyúmding pé lé le, yù lé lô byi aq.

¹⁴ Haû ningdup hpó Alesander gi, ngo lé a ge é myo myo kut bê nghut ri; haû Yhumsîng gi, yhang kut é eq rajung za, yhang lé dam byi râ nghut lhê.

¹⁵ Yhang gi, ngamoq é danglù lé wum kat htuq htíng bê sù nghut é yanmai, nàng le, yhang lé sidiq ra râ nghut lhê.

¹⁶ Sâng-hî dàm, ngá gûng lé ngò tâi hung é hkûn, yuq hkangmó gi, ngá é hkyam shut a bo lom e za, ngo lé pyâm tô akô. Nghut kôlhang, haû gi, yhangmoq ahtoq má mara a dut sháng gaq.

¹⁷ Nghut kôlhang, ngò dông mai danglù haû lé rago wó hko pyo kat luí, tûngbaù pé banshoq bang wó gyo kó sháng gaq ga, haû Yhumsîng gi, ngá hkyam shut yap to mù, ngo lé wum-o byi é nghut lhê. Hau htoq agó, ngò gi, hkanghkyi é nhut mai le

hkyi yù hui bê nghut lhê.*

¹⁸ Haû Yhumsîng gi, ngo lé agè ashop é hkyô hkangmó mai hkyi yù luî, Yhang é mauhkûng mingdán má ngón za shuî jé râ nghut lhê. Hpung-wup shing kang gi, Yhâng chyáng ahtum abyuq ru joq nyî sháng gaq ô. Amen.

Shi-kyám Dang

¹⁹ Priskila eq Akula nhik lé le, Onesihpuru yhumbyù wuî lé le, bo shi-kyám byi laq.

²⁰ Erastu gi, Korinhtuq myuq má nyi gyó to bê; Trohpimu lé gi, nò luî, Melitu wà mó má ngò nyhi pyâm to bê nghut lhê.

²¹ Nàng gi, wó dut é í, gyoqmyò a wàng shi lé, shí má jé lé lò aq. Ubulu gi, nàng lé shi-kyâm kat ri; haû eq rajung za, Pudén, Linu, Klodia eq gumang wuî banshoq bang gi, nàng lé shi-kyâm kat akô nghut ri.

²² Haû Yhumsîng gi, náng é woi-nyí eq rahá nghut nyî sháng gaq. Jeju gi, nungmoq chyáng ru joq nyî sháng gaq ô.

* **4:17** Haû hkûn lé, Romaq byu pé, byù sat lé gi, hkanghkyi lé tsô pyâm lhê.

Chyoiyúng chyumlaiká: dangshikaq asik; Zaiwa

New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

23f9fc55-a8a4-59ef-9513-707ec336b0ee